

Abstract

Ruth Licht: «Jau m'hai regalà per mes otganta in'exposiziun». Ina vita sco fotografa ad Arosa

Dapi blers decennis viva e lavura la fotografa Ruth Licht (*1923) ad Arosa. Ses geniturs eran oriunds da la Germania. Il bab Jakob Licht era in architect enconuscent; ses edifizis e sias renovaziuns d'hotels han marcà il maletg dal vitg d'Arosa. La mamma Hedwig Licht manava ina pensiun. Tuts dus avevan ideas urbanas modernas ed uschia è Ruth Licht vegnida gia d'uffant en contact cun l'art.

Enturn la mesadad dals onns 1940 ha Ruth Licht fatg in emprendisadi sco fotolaboranta tar Foto Brandt ad Arosa. Auter che las bleras dunnas che lavuravan en la branscha da fotografia, è ella vegnida scolada davent da l'entschatta era en fotografar. Suenter l'emprendisadi ha ella lavorà in pèr onns en differents lieus da la Svizra, t. a. sco fotografa sin via ed en hotels l'enviern da l'olimpiada 1948 a San Murezzan. Enturn il 1955 è ella returnada ad Arosa ed ha lavorà puspè tar Foto Brandt, sco fotografa generalista. Sco quai ch'igl era usità a la champagna, fascheva ella tut las lavurs: lavur da labor, reportaschas d'occurrenzas da sport, concerts u projects da construcziun, purtretts u fotografias da festas da famiglia.

Vers la fin dals onns 1960 era il fotografar daventà in hobi popular e las fatschentas da fotografia stuevan cumbatter per l'existenza. Ruth Licht ha tratg sias consequenzas ed ha cumenzà l'entschatta dals onns 1970 ina piazza sco vendidra en la fatschenta da tegnairchasa Gysi.

Ruth Licht n'è mai stada maridada. Quai n'è betg adina stà simpel, perquai che surtut dunnas nubilas vegnivan marginalisadas e savens tractadas a moda sprechtschanta. Il 1966 ha ina gruppa da dunnas sulettas fundà ad Arosa il «Kreis der Berufstätigen». En quest circul, che ha existì var 20 onns, ha Ruth Licht chattà in nov champ d'actividad, nua ch'ella ha pudì cumbinar ses interess per l'art e l'istorgia cun la fotografia. Las commembras dal circul eran da l'avis che Arosa saja ina vischnanca cun pauca cultura ed han vulì midar quai. Ellas han organisà excursiuns d'istorgia d'art en il Scanvetg ed en l'ulteriur Grischun ed han alura preschentà lur «scuvertas» a la publicitad en il rom da referats cun dias. La «Arosener Zeitung» e la baselgia evangelica, sut il tetg da la quala il circul era activ, ignoravan lur activitads. Pir a l'entschatta dals onns 1970 è vegnida in'emprima renconuschientscha da vart da l'unìun da cura: Ruth Licht è vegnida dumandada da tegnair in referat cun dias davart la regiun e la gliעד dal Scanvetg. Silsuentar ha ella fatg numerus auters referats, ha manà onns a la lunga excursiuns en il Scanvetg ed ha surpiglià suenter ses pensiunament il 1985 il «program da giasts». Il 1992 è ella daventada curatura dal museum regiunal dal Scanvetg «Eggahus» ad Arosa. Fin oz – en il fratemp ha ella 83 onns – ha ella quità dal museum e tegna regularmain referats.

Il 2003 ha ella tematisà per l'emprima giada sia atgna ovra ed ha preschentà in'elecziun da sias fotografias. L'exposiziun «Begegnung mit Licht. 60 Jahre Blick durch's Objektiv» ha gì grond success e Ruth Licht è daventada enconuschenta sur ils cunfins dal chantun ora.